

历代名臣传

历代名臣传

歷代名臣傳卷之三十

高安朱軾

全訂

漳浦蔡世遠

宋

虞允文 陳康伯

虞允文字彬甫隆州仁壽人六歲誦九經七歲能屬文以父任入官丁母憂哀毀骨立既葬朝夕哭墓側墓有枯桑兩烏來巢念父鰥且疾跣步不忍離左右父沒始登紹興

二十三年進士通判彭州權知黎州渠州秦檜當國蜀士
多屏棄檜死以中書舍人趙達薦召對謂人君必畏天必
安民必法祖宗又論士風之弊以文章進必抑其輕浮以
言語進必黜其巧僞以政事進必去其苛刻庶可任重致
遠且極言四川財賦科納之弊帝嘉納之除秘書丞累遷
禮部郎官金主亮脩汴已有南侵意而朝廷置邊備不問
及金使施宜生頗泄敵情允文乃疏言金必敗盟兵出有
五逆願豫備禦未幾僭工部尚書充賀正使還言金人方
運糧造舟而亮又有看花洛陽之語請脩淮海之備除中

書舍人直學士院時三衙管軍以宦寺充承受允文言自古人主大權不移于奸臣則落于近倖秦檜盜權十有八年檜死權歸陛下邇來三衙交結中官宣和明受厥鑒未遠帝大悟立罷之金使來賀生辰口傳亮悖慢語欲得淮南地索將相大臣議事于是聞金人當窺襄漢朝議遣成閔爲京湖制置使將禁衛五萬以禦上流允文曰兵來不除遑敵爲虛聲以分我兵成其出淮奸謀耳不聽三十一年七月金主亮徙汴允文復語宰臣陳康伯曰軍約程在江池宜令到池者駐池到江者駐江若敵出上流則荆湖

之軍捍于前。江池之軍援于後。若出淮西。則池之軍出巢縣。江州軍出無爲。可爲淮西援。是一軍而兩用之。康伯然其說。然閔軍竟屯武昌。九月。金命李通爲大都督。造浮梁于淮水上。金主自將兵。號百萬。璫帳相望。鉦鼓之聲不絕。十月。自渦口渡淮。先是。劉錡措置淮東。王權措置淮西。至是。權首棄廬州。錡亦回揚州。中外震恐。帝欲航海。惟康伯力贊親征。已而權又自和州遁歸。錡回鎮江。遂盡失兩淮。十一月。壬申。金主率大軍臨朐。別以兵爭瓜洲。時樞臣葉義問督江淮軍。以允文參軍事。適朝。命成閔代錡。李顯

忠代權義問乃使允文往蕪湖趣顯忠交權軍且犒權軍于采石丙子允文至采石權已去顯忠未來敵騎充斥官軍三五星散解鞍束甲坐道旁皆權敗兵也允文立招諸將勉以忠義曰金帛告命皆在此待有功衆皆曰願死或曰公受命犒師不受命督戰他人懷之公任其咎乎允文叱之曰坐待顯忠必悞國事危及社稷吾將安避至江濱見江北已築高臺中建黃屋偵知金人以明日濟江時敵兵實四十萬馬倍之宋軍纔一萬八千允文乃命諸將列大陣不動分戈船爲五其二並東西岸而行其一駐中流

藏精兵代戰其二藏小港備不測部分甫畢敵已大呼亮
操小紅旗麾數百艘絕江而來瞬息抵南岸者七十艘直
薄宋軍軍少却允文入陣中撫時俊背曰汝膽畧聞四方
立陣後則兒女子耳俊卽揮雙刀出士殊死戰中流官軍
亦以海鰐船衝敵舟皆平沉敵半死半戰日暮未退曾育
潰軍自光州至允文授以旗鼓從山後轉出敵疑援兵至
始遁又命勁弓尾擊大敗之允文乃犒將士謂曰敵今敗
明日必復來夜半部分諸將分海舟緇上流別遣兵截楊
林口丁丑敵果至因夾擊之復大戰焚其舟三百旣而敵

遣詔來諭王權似有宿約者。允文曰：此反間也。卽復書言權已置典憲。新將李世輔也。願一戰以決雌雄。亮得書大怒，遂焚龍鳳車而趨瓜洲。李顯忠至自蕪湖，允文語之曰：敵入揚州，必與瓜洲兵合。京口無備，我當往。公能分兵相助乎？顯忠分萬六千與之。甲申，允文至京口。揚存中、成閔、邵宏淵諸軍皆會，不下二十萬。惟海鯨船不滿百。戈船半之。允文乃聚材治鐵，改馬船爲戰艦，且借之平江。遣張深守滁河口，扼大江之衝，以苟定。駐下蜀爲援。庚寅，亮至瓜洲。允文與存中臨江按試，戰士踏車船中流，上下三周，金

山回轉如飛。敵持滿以待。相顧駭愕。乙未。亮爲其下所殺。帝聞允文之績。嘉嘆。謂陳俊卿曰。允文公忠出天性。朕之裴度也。詔往兩淮措置。允文奏收兩淮五策。不報。明年正月。以允文充川陝宣諭使。陛辭。言金亮旣死。彼國方亂。天相我恢復也。和則海內氣沮。戰則海內氣伸。帝以爲然。允文至蜀。與大將吳玠經略中原。遂進取鳳翔。復鞏州。孝宗受禪。用史浩議。欲盡棄陝西。退守蜀口。允文言。恢復莫先于陝西。陝西五路新復州縣。又係于德順之存亡。一旦棄之。則窺蜀之路愈多。西和階成利害至重。前後凡十五疏。

爭之不能得。隆興元年，史浩相，遂爲詔書棄地。及允文入對，帝問及棄地。允文以笏畫地，陳其利害，且言：「今日有八可戰。」帝曰：「此史浩誤朕也。」尋除兵部尚書。湖北京西宣撫使時方遣使議和，湯思退又欲棄唐鄧海泗。允文五疏力爭，不從，遂乞致仕。罷知平江府。卒。棄唐鄧二州。二年，金兵復南下，帝乃貶思退，悔不用允文言。乾道元年，陳俊卿薦允文可大用，拜參知政事，兼知樞密院事。是秋，金遣完顏偁議事，偃蹇不敬。允文請斬之。三年，吳璘卒，擇代。帝諭允文曰：「無以易卿。」卽拜資政殿大學士。四川宣撫使允文過

郢奏築黃鴈山城過襄陽奏脩府城至蜀尤以軍政爲急
閱諸軍第其壯怯爲三上備戰中下備輜重老者少者不
預握兵凡萬人減緡錢四百萬汰去之兵先有勞績者置
員闕處之興洋義士者民兵也紹興初以七萬計大散之
戰將不授甲驅使先官軍死亡畧盡允文命利帥晁公武
覈實得二萬三千九百餘人又得陝西弓箭手法參紹興
制爲一書俾將吏守之以馬政什張松奏依舊制分茶馬
爲川秦司金洋興元歸正人二萬各分給官田俾得振業
叩蜀十四郡告飢所施荒政凡六十五事五年八月拜右

僕射同中書門下平章事兼樞密使允文好薦知名士及
爲相籍人才爲三等有所見聞卽記之號材館錄凡所舉
帝皆收用如洪适汪應長朋銓周必大王十朋趙汝愚晁
公武李燾皆允文所薦也帝以兵冗財匱爲憂允文與俊
卿議革三衙雜役汰冗籍三軍無怨言六年俊卿以奏畱
龔茂良帝震怒允文請對極論帝意稍解乃命俊卿判福
州後聞金人欲以三十萬騎奉遷陵寢來歸中外洶洶允
文謂金方懲亮決不輕動不過以虛聲撼我耳敵卒無他
自莊文太子薨儲位未定允文累疏懇陳七年正月始下

詔立恭王惇爲皇太子。胡銓以臺評去。允文奏留之。經筵銓薦朱子。帝以問允文。允文謂熹不在程頤下。遂召朱子。朱子不至。檢校院以六條抑上書人。允文力言不可從之。金使入見。驕倨甚固。請帝降榻問金主起居。帝不許。使跪不起。侍臣錯愕失措。允文請大駕還禁中。因諭之曰。大駕旣興。難再御殿。使人來且隨班上壽。金使慚而退。八年四月。御史蕭之敏劾允文。允文上章待罪。上過德壽宮。太上曰。采石之功。之敏在何許。毋聽其去。帝爲出之。敏。允文言之敏端方。乞召歸以闢言路。帝歎其忠厚。會命選諫官。允

文以李彥穎林光朝王質對。三人皆鯁亮。又以文學推重于時。帝久不報。而曾覲薦一人。卽賜第。擢諫議大夫。允文爭之不從。力求去。授少保武安軍節度使。四川宣撫使。進封雍國公。先是蜀軍月給米一石五斗。不足贍其家。允文捐宣司錢三十萬易米。計口增給。在蜀一歲。淳熙元年卒。後四年。帝幸白石大閱。見軍皆少壯。謂輔臣曰。允文沙汰之効也。詔贈太傅。謚忠肅。允文姿雄偉。長六尺四寸。慷慨有大志。而言動有則度。望而知爲任重之器。早以文學致身臺閣。晚際時艱。出入將相。垂二十年。孜孜忠勤。無二。嘗

注唐書五代史藏于家有詩文十卷經筵春秋講義三卷奏議二十二卷內外志十五卷行于世。

陳康伯字長卿弋陽人宣和三年中上舍丙科累遷太學正丁內艱貴溪盜將及其鄉康伯起義丁逆擊俘其渠魁邑得全通判衢州攝郡事盜發白馬原督州兵濟王師進討克之提舉江東常平茶鹽高宗幸建康康伯以職事過闕因請擇將帝嘉納之知泉州海盜間作康伯以上意招懷盜多出降籍爲兵久之不逞者陰倡亂論殺之州以無事秩滿三奉祠垂十年秦檜死起知漢州召對除吏部侍

郎首請節用寬民。凡州縣取民無藝。許監司互察。臺諫彈劾。尋兼禮戶二部。乞約歲用。會所入。儲十之一二。備水旱。復兼刑部。前坐爲檜所陷。未及洗滌者。康伯平讞直寃。士大夫存沒多賴之。累擢吏部尚書。參知政事。尋拜尚書右僕射。同平章事。先是葉義問賀允中使還。言金必敗盟。康伯請早爲之備。建四策。一增劉錡荆南軍。以重上流。二分畫兩淮地。命諸將結民社。各保其境。三劉寶獨當淮東。將驕卒少。不可倚。四沿江諸郡。修城積糧。以固內地。及金主亮南下。議舉兵。康伯傳上旨曰。今日更不問和與守。直問